

Powšitkowne WOZJEWJENJA

njedźelu, 21. februara 2021

Wusyłanje Božemu mšow

Serbskorěčnu Božu mšu móža wěriwi tutu njedźelu, 21. februara, znova jako live-stream w interneće scěhować. Dopoldnja w 9 hodź. přenjese so wona z Chróšćanskeje, dalša hižo we 8.30 hodź. z Kulowskeje cyrkwy. Linkaj stej na internetowej stronje www.posol.de/wozjewjenej.

Różowc w Róžeńće

Na modlenje swjateho różowca w serbskej a němskej rěči sobotu, 27. februara, we 18.00 hodź. su wěriwi do Róžeńčanskeje swjatnicy přeprošeni. W tym času budže Najswjećiše wustajene.

Ekumeniski póstny seminar lětsa online

Lětuši ekumeniski póstny seminar pod temu „Swoboda a zamołwitosć křesćanskeho čłowjeka. Kak móžemy zhromadnje žiwi być?“ hodži so jeničce online scěhować. Wón zahaji so pónđzelu, 22. februara, w 19.30 hodź. Harald Lamprecht, w sakskej Ewangelsko-lutherskej krajnej cyrkwi zamołwity za prašenja swětonahlada a sektow a jednaćel Ewangelskeho zwjazka w Sakskej, wěnuje so w swoim přednošku prašenju „Hdže smy poprawom žiwi?“. Wšitcy su k tomu přeprošeni. Link je pod www.posol.de/wozjewjeny. Onlinowy seminar pokročuje na slědowacymaj pónđzelomaj: 1. měrca přednošujetaj k temje „Kak smy poprawom žiwi?“ wjesnjanosta Thomas Martolock a farar Friedemann Wenzel, wobaj z Kumwałda, a 8. měrca referuje abatisa Gabriela Hesse z Marijineje hwězdy k temje „Z čeho smy poprawom žiwi?“.

Eksercicije w póstnym času

Na eksercicije we wšědnym žiwjenju přeprošuje Budyski klóšterk. Wone wotměwaja so we wobłuku 100. róčnicy znowazaloženja Drježdžansko-Mišnjanskeho biskopstwa. Pod hesłom „Rosć na dobrym dnje“ móža wobdźělnicy wo swójskim žiwjenskim puću a puću wěry rozmyslować a sej Bože slědy wotkryć. Jónu wob tydžeń zetkaja so wšitcy k zhromadnemu modlenju a wuměnje nazhonjenjow. Přenje zetkanje budže pónđzelu, 22. februara, w 19.30 hodź. w klóšterskej cyrkwi. Zajimcy zeznaja wotběh a wšelake elementy. Přizjewjenja přijimuju klarisy telefonisce pod čisłom (0 35 91) 21 10 83 abo z mejlku na klarissen@gmx.de. Link k dalšim poskitkam Drježdžansko-Mišnjanskeho biskopstwa k eksercicijam we wšědnym žiwjenju je pod www.posol.de/wozjewjeny.

Mandźelski seminar

Seminaraj k přihotej na sakrament mandźelstwa wotmějetej so wot pjatka do soboty, 19. do 20. měrca, kaž tež wot 16. do 17. apryla, w Smochčanskim kubłanišću swjateho Bena. Přizjewjenja přijimuju so hač do pónđzele, 1. měrca, jeničce online na internetowej stronje dekanatneho dušepastyrstwa. Link k wotpowědnemu formularj a k dalšim pokiwwam je pod www.posol.de podaty.

Třitydźenski eksperiment za młodostnych

„TY wučinješ ROZDŽĚL. Twoje žiwjenje. Twoja wěra. – Třitydźenski eksperiment“
rěka hesło póstneho poskitka za młodostnych wot 14 lět. Přez wosebitu app dóstanu wobdžělnicy wot 28. februara do 21. měrca trójce wob džeń impulsy, kiž maja k rozmyslowanju, kreatiwnosći abo k modlenju pohnuwać. Stajnje njedželu wječor zetkaja so wšitcy k digitalnemu nyšporej, na kotrymž wobsteji móžnosć, so wo swoich nazhonjenjach wuměnjeć. Štóž chce so na projekće wobdžělic, měł sej poł hodžiny wob džeń za njón zaplanować. Wjace informacijow kaž tež móžnosć so přizjewić nańdu młodostni pod www.posol.de